



Til ordførarane og rådmennene i kommunane:
Fyresdal, Hjartdal, Kviteseid, Nissedal,
Seljord, Tokke og Vinje.

13. mai 2009

Innkalling til rådsmøte

Stad:	Quality Straand Hotel, Vrådal
Dato:	Tysdag 19. mai 2009
Kl. slett:	09.00

Til møtet 19. mai ligg føre forslag til rapport gjeldande arbeidsprogrammet.

Prosjektleiar Ole Dalen vil vera tilstades i sak 42 og legge fram resultatet frå handsamingane i kommunane når det gjeld felles grafisk profil for regionen.
Karin Kvålsæth legg fram sluttrapport gjeldande prosjektet Utvikling av landbruket i Vest-Telemark.
Dagleg leiar Gunnar Ofte i Vest-Telemark Bedriftshelseteneste er tilstades under sak 44 og utfordrar kommunane til å nytte denne tenesten.

I samband med prosjektet *prøvebustad i Øyfjell* er bygdelivsmeklar Emilie Asplin og arkitekt Sverre Sondresen tilstades i sak 47 og orienterer nærmere om ei mogleg utviding av prosjektet.

Som avsluttande post på programmet har Vest-Telemarkrådet invitert til dialogmøte med fylkesmann Kari Nordheim Larsen og medarbeidaranar. Ein vil mellom anna drøfte utviklingsarbeidet i regionen og samarbeidet mellom dei 2 forvaltningsnivåa. Det har også kome innspel om mogleg etablering av nettverksgruppe for personell som arbeider med plan- og bygningsloven.

Vi ynskjer vel møtt i Vrådal.

Venleg helsing
Vest-Telemarkrådet

Olav Urbø (sign)
regionordførar

Kjell Gunnar Heggenes
regionrådsleiar

Sakliste til rådsmøte 19. mai 2009.

Sak 40/2009 Referat frå rådsmøte 21. april 2009.

Sak 41/2009 Møtet i Vest-Telemarktinget 16. juni 2009.

- Forslag til sakliste
- Forslag til rapport, arbeidsprogrammet

Sak 42/2009 Felles grafisk profil for Vest-Telemark

Sak 43/2009 Sluttrapport landbruksplanen

Sak 44/2009 Vest-Telemark Bedriftshelseteneste
tilbod om bedriftshelseteneste

Sak 45/2009 Drøftingssaker

- *Kollektivplan for Telemark*
- *Dialog mellom ulike politiske nivå*

Sak 46/2009 Ymse

Sak 47/2009 Prøvebustader i Vest-Telemark

Sak 48/2009 Møte med fylkesmannen

Referat frå rådsmøte 21. april 2009.

Tilstades: Regionordførar Olav Urbø, Torstein Tveito, Anne-Nora Oma Dahle, Solveig S. Abrahamsen, Olav Tho, Arne Vinje, Bjørn Nome, Ketil Kiland, Hans Bakke, Kristian Torp-Hansen, Hans Kristian Lehmann, Sverre Sæter og Kjell Gunnar Heggenes.

I tillegg møtte Rolf-Helge Grønås frå Telemark fylkeskommune og Haldor Kaasin frå Vest-Telemark Næringsutvikling.

Sverre Sæter, ny rådmann i Nissedal kommune, vart ynskt velkommen til sitt fyrste møte i Vest-Telemarkrådet

Møteinkalling og sakliste vart godkjent utan merknader.

Sak 33/2009 Referat frå rådmøte 17. mars 2009.

Vedtak: Referat frå rådsmøte 17. mars 2009 vert godkjent utan merknader.

Sak 34/2009 Forslag til årsmelding og årsrekneskap 2008 for Vest-Telemarkrådet.

Fastsettjing av stad for møtet i Tinget, drøfting av tema.

Vest-Telemarkrådet drøfta det framlagte forslaget til årsmelding og rekneskap. Sluttrapport for Landbruksplanen vil ligge føre i nær framtid og denne vil bli lagt fram på komande rådsmøte. Rådet drøfta også stad for komande Vest-Telemarkting samt aktuelle tema for møtet i Tinget.

Vedtak: Forslag til årsmelding og årsrekneskap 2008 for Vest-Telemarkrådet vert samrøystes godkjent. Møtet i Vest-Telemarktinget 16. juni vert lagt til lokala til Dyrsku'n i Seljord. Som fagleg tema vil ein ta for seg Stortingsmelding nr. 25 (2008-2009), "Lokal vekstkraft og framtidstru. Om distrikts- og regionalpolitikken". Ein ynskjer å invitere representantar frå politisk leiing i departementet til møtet i Tinget.

Sak 35/2009 "Med argusøyne på WTO". Midlar til vidareføring av prosjektet.

Vest-Telemarkrådet sa i 2008 ja til å delta i prosjektet "Med argusøyne på WTO" og kostnadene vart dekka over Rådets budsjett.

Arne Vinje, som er Vest-Telemarkrådets representant i ei nedsett prosjektgruppe, kunne opplyse at det ikkje var halde møte i gruppa dette året.

Til rådsmøtet 21. april 2009 låg det føre invitasjon frå Fjellregionen til å vidareføre prosjektet. Samla budsjett for 2009 er sett til kr. 132.500 og det er invitert i alt 11 samarbeidspartar.

Vedtak: Vest-Telemarkrådet seier ja til vidareføring av prosjektet og løyver kr. 20 000,- til føremålet. Rådet legg til grunn at det vert gjeve god informasjon til samarbeidspartane, og at det vert arbeidd systematisk i prosjektgruppa.

Ein vil invitere prosjektleiar Helge Christie til eit komande møte i Rådet eller Tinget.

Sak 36/2009 Skulestruktur i kommunane, pedagogiske, samfunnsmessige og økonomiske sider – mogleg område for forsking.

På bakgrunn av ein førespurnad om å bidra i debatt om skulestruktur i Nissedal kommune, låg det føre brev frå Telemarksforsking adressert til Vest-Telemarkrådet.

Forskarane viser i brevet til at det i dag ikkje ligg føre nokon generell oversikt over forsking på skulestruktur og kva grendeskulane betyr for distrikta. Telemarksforsking ynskjer å gjennomføre ei slik undersøking for å samanfatte og presentere det som er gjort innan dette området både nasjonalt og internasjonalt. Samla kostnader for arbeidet er kalkulert til kr. 200 000,-.

Vedtak: Vest-Telemarkrådet ser eit slikt arbeid som interessant og føreset at det ligg til grunn ei kvalitetssikring av dei ulike undersøkingane. Mogleg søknad om økonomisk bidrag frå vår region må rettast til Fellesfondet.

Sak 37/2009 Drøftingssaker.

Mogleg samarbeid om logoped-teneste.

Saken kom opp på bakgrunn av eit spørsmål om samarbeid om logoped-tenestene i regionen. Vest-Telemark PPT har i dag eit felles logoped-tilbod innarbeidd i sitt opplegg, og i tillegg finst det ulike løysingar for logoped-tenester i dei enkelte kommunane.

Vedtak: Vest-Telemarkrådet viser til dei ulike logoped-tenestene som finst i regionen og vil kome attende til saken ved eit seinare høve.

Samhandlingsreformen innan helsetenesten.

Med utgangspunkt i drøftingane i sak 27/2009 på rådsmøtet 17. mars foreslo Solveig S. Abrahamsen at det vert sett ned ei arbeidsgruppe med tanke på å fylge med i reformprosessen, kartlegge kva fagkompetanse ein har i regionen og sikre oppdatering i høve til politisk handsaming. Ei stortingsmelding om saken vil ligge føre i juni 2009.

Vedtak: Rådmannsutvalet får i oppdrag å legge fram forslag til arbeidsgruppe og forslag til mandat for denne.

Regionrådskonferansen, regionråda si rolle i forvaltingssystemet.

Regionordførar orienterte frå arbeidet i arbeidsgruppa herunder frå eit møte 23. mars der det var tilstades representantar frå regionråda i Sogn, Bergen og Salten.

Rådet drøfta mogleg mandat for eit felles sekretariat.

Vedtak: Vest-Telemarkrådet tek orienteringa til vitande.

Aktuelle tema til møtet med fylkesmannen 19. mai.

Førebels tema er:

- Forvaltningsreformen
- Fylkeskommunen og Fylkesmannen. Tilhøvet mellom dei 2 forvaltningsnivåa.
- Ny lov om biomangfald

Sak 38/2009 Orienteringssaker.

Telemark Utviklingsforum.

Telemark fylkeskommune har sett i gang eit arbeid med å utforme ein ny regional planstrategi. Som ein del av prosessen har ein etablert Telemark Utviklingsforum med representantar frå fylkeskommunen, dei 4 kommuneregionane samt deltagarar frå sentrale organisasjonar i Telemark.

Regionordførar orienterte frå eit møte i Telemark Utviklingsforum 3. april 2009.

I samband med planarbeidet vil fylkeskommunen i nær framtid sende ut eit dokument på høyring i kommunane og regionråda. Planstrategien vil bli delt inn i følgjande 4 tema:

- Kompetanse
- Samferdsel
- Miljø/klima
- Livskvalitet og attraksjonskraft

Vedtak: Vest-Telemarkrådet tek orienteringa til vitande.

Bompengesaken.

Fylkesrådmannen og regionrådsleiar orienterte om status i saken.

Fylkesutvalet har gått inn for å opprette eit bompengeselskap med namnet

"E134 og Rv36 Telemark AS". Eigarar vil vera Telemark fylkeskommune og aktuelle kommunar. Selskapets aksjekapital er kr. 400 000,- som er ei auke i høve til det opprinnelige forslaget. Kommunane står fritt til å auke sin andel tilsvarende. Selskapet skal administrerast gjennom ei avtale med Vegfinans AS som administrerer fleire bompengeordningar på austlandet. Bomselskapet skal ha eit styre på 3 personar der styreleiar veljast frå Telemark fylkeskommune medan dei 2 andre i styret vert valde frå eigarkommunane elles.

Saken skal opp til endeleg handsaming i Fylkestinget 28. – 29. april.

Vedtak: Vest-Telemarkrådet tek orienteringa til vitande.

Som Vest-Telemarkrådets kandidat til styret i bomselskapet vel ein Solveig S. Abrahamsen med Olav Urbo som vararepresentant.

Kollektivtrafikk.

Telemark fylkeskommune skal i komande møte i fylkestinget handsame sak om innkjøpsordning for kollektivtrafikk gjeldande frå 2010.

Av forslaget til vedtak går det fram at fylkeskommunen ynskjer å endre avtalene med kollektivselskapa frå netto-avtaler til brutto-avtaler. Brutto-avtaler inneber at inntektsansvaret vert overført frå selskapa til Vest-Viken Kollektivtrafikk AS. Forslaget til ordning vil i denne omgang gjelde Grenland, men opnar på sikt for å ta inn heile eller delar av Vestmar.

Vest-Telemarkrådet har i brev av 12. mars åtvara mot å gje slike fullmakter til Vestviken Kollektivtrafikk AS, og bede om at fylkeskommunen fortsatt skal ha styringa med kollektivtrafikken og ta kommunane med som viktige samarbeidspartnarar.

Vedtak: Vest-Telemarkrådet tek orienteringa til vitande.

Vest-Telemarkrådet som § 27 – selskap.

Regionrådsleiar viste til skriv frå Telemark kommunerevisjon IKS der revisor Valeria Sunde stiller spørsmål ved korleis Vest-Telemarkrådet er formelt organisert. Bakgrunnen for spørsmålet er at det ikkje er gjort endringar i einingsregistret i Brønnøysund etter danning av Rådet i 1996, og at Vest-Telemarkrådet fortsatt står oppført som ”annan juridisk person” under Vest-Telemark Næringsbygg.

Vedtak: Regionrådsleiar får i oppdrag å gjera naudsynte tiltak i høve til å organisere Vest-Telemarkrådet etter kommunelovens § 27.

Sak 39/2009 Ungt Entreprenørskap Telemark. Orientering v/Didrik Bakken Riiser og Stanley Jacobsen.

I denne saken var Didrik Bakken Riiser frå Telemark fylkeskommune og Stanley Jacobsen frå *Ungt Entreprenørskap Telemark* tilstades og orienterte om entreprenørskapsarbeidet i fylket. Organisasjonen er peika ut som fylkeskommunen operatør innanfor satsinga på entreprenørskap i utdanninga og det er løyvd midlar for 3-årsperioden 2009 – 2011.

Kommunane og kommuneregionane er invitert til å delta i satsinga.

Vedtak: Vest-Telemarkrådet tek orienteringa til vitande.

Referent: Kjell Gunnar Heggenes

Sak 41/2009 Møtet i Vest-Telemarktinget 16. juni 2009.

Forslag til sakliste.

1/2009 Opprop

2/2009 Godkjenning av innkalling og sakliste

3/2009 Val av 1 person til å skrive under protokollen i lag med regionordførar

4/2009 Godkjenning av årsmelding og årsrekneskap for 2008

5/2009 Val av revisor

6/2009 Arbeidsprogram for 2008 – 2009, rapport pr. juni 2009.

7/2009 Val av regionvaraordførar for perioden august – desember 2009.

8/2009 Godkjenning av vedtektsendringar i samband med Hjartdal kommune sin utgang frå Vest-Telemarkrådet.

9/2009 Stortingsmelding nr. 25 (2008 – 2009), ”*Lokal vekstkraft og framtidstru. Om distrikts- og regionalpolitikken*”.

Sak 41 /2009 Forslag til rapport, arbeidsprogrammet

Rapport pr. juni 2009 - Arbeidsprogram 2008 -2009.

VISJON: VEST-TELEMARK - EIN LEVANDE REGION

Kommunane i Vest-Telemark er kommunar med sær preg, høg kulturprofil og målretta samhandling. Regionen er attraktiv for busetjing, næringsetablering og framvekst av kompetansmiljø. Livet i Vest-Telemark er prega av fokus på løysingar og positive vinklingar.

Mål 1 Oppretthalde folketalet og busetnaden i heile Vest-Telemark

Tiltak:

- Auke dei unge si sjølvkjensle og tilknyting til distriktet, og stimulere til entreprenørskap
- Ha god tilgang til vidaregåande skule, samt etter- og vidareutdanning for innbyggjarane
- Kartlegging av viktige lokaliseringsfaktorer for potensielle tilflyttarar
- Vidareføre småbruksprosjektet
- Stimulere til rekruttering av arbeidskraft
- Fylgje opp dei aktuelle tiltaka i næringsplanen og landbruksrapporten

Mål 2 Sterk regional samkjensle og styrka Vest-Telemarkidentitet

Tiltak:

- Stø opp om kulturtiltak som fremjar kjennskap, identitet og samhandling
- Legge til rette for godt regionalt samarbeid, herunder elektronisk kommunikasjon
- Drive aktiv marknadsføring av regionen
- Drive alliansebygging/lobbyverksemrd og kome tidleg inn i dei ulike politiske endringsprosessane

Mål 3 Vidareutvikling og nyetablering av verksemder i Vest-Telemark med grunnlag i distriktets sær preg og lokale ressursar.

Tiltak:

- Fylgje opp dei aktuelle tiltaka i næringsplanen og landbruksrapporten
- Sikre tilgang på eigenkapital
- Stimulere til samordning av marknadsføring av reiselivet i regionen
- Marknadsføre føremonane i regionen
- Legge til rette for lokal foredling og småskalaproduksjon
- Legge til rette for etablering av kompetanseverksemder og nettverk
- Styrke samarbeidet mellom regionalt og lokalt næringsapparat.

Mål 4 E 134 og Riksveg 36 held fram som det viktigaste hovudsambandet mellom aust og vest. Utvikle potensialet i Telemarksvegen (riksveg 41), som viktig korridor mot sør og kontinentet. Etablere ny infrastruktur for kommunikasjon.

Tiltak:

- Samarbeid med Haukeligvegen AS, Arbeidsgruppa for E 134/Rv 36, Telemarksvegen Vest-Telemark Næringsforum og andre viktige grupperingar
- Arbeide mot sentrale styresmakter, spesielt i høve til Nasjonal Transportplan og vurdere bruken av ressursar
- Fremje tiltak for alternativ finansiering av sentrale investeringsprosjekt
- Arbeide for auka midlar til investeringar og vedlikehald av øvrige riks- og fylkesvegar
- Sikre full utbygging av breiband i regionen
- Arbeide for full dekning innan mobilsamband og digitalt bakkenett
- Arbeide for realisering av høgfartsbane over Haukelifjell

Rapport:

Mål 1 Oppretthalde folketalet og busetnaden i heile Vest-Telemark.

Auke dei unge si sjølvkjensle og tilknyting til distriktet, og stimulere til entreprenørskap.

Entreprenørskapsprosjektet.

Elisabeth Lid sitt engasjement som lokal prosjektleiar vart avslutta 31. desember 2008 og ansvaret for det vidare arbeidet ligg no til den enkelte kommune.

Bakgrunnen for satsinga har vore ynskjet om å skape ein kultur for innovasjon og entreprenørskap, der dei unge ser moglegheiter, viser pågangsmot og utviklar grunderkompetanse gjennom ulike tiltak i og utanfor skulen.

På fylkesplan er Ungt Entreprenørskap Telemark engasjert i ein 3-årsperiode som Telemark sin operatør innafor satsinga på entreprenørskap i utdanninga. Kommunar, regionar, organisasjonar og privat sektor er invitert til å delta i denne satsinga.

Ha god tilgang til vidaregåande skule, samt etter- og vidareutdanning for innbyggjarane.

Vest-Telemark Vidaregåande Skule.

Skulen tilbyr vidaregåande utdanning innan almenfag, helse- og sosialfag og teknikk og industriell produksjon. Ein har for tida 170 elevar innan desse faga og det er 48 personar tilsett ved skulen.

Vest-Telemark Vidaregåande skule har også førarkortopplæring på skulen der dei 2 lokale køyreskulane er involvert. Skulen er tillagt regionansvaret for opplæring på snøskuter og har regionavtale med Statkraft om etterutdanning innafor dette feltet. Skulen har ei tid hatt opplegg for undervisning av innsette ved soningsleiren i Fyresdal.

I tillegg organiserer Vest-Telemark Ressurssenter eit vaksenutdanningstilbod der ein no har 20 elevar. Dette er eit samarbeid mellom skulen, fylkesmannen, fylkeskommunen, NAV og dei enkelte kommunane.

Skulen har også eit tilbod til vaksne om utdanning som helsefagarbeidar eller som barne- og ungdomsarbeidar over 2 år. Utdanningsopplegget er fleksibelt og dekker fleire utdanningar. Vidare finst det eit nytt opplegg gjeldande norskopplæring for folk i arbeid der 8 ulike nasjonalitetar er representert.

Det er også sett i gang eit nytt opplegg på kveldstid med tanke på å opparbeide studiekompetanse over 2 år. Spesielt for dette opplegget er at deltakarane kan starte når som helst i skuleåret og få nemnde kompetanse etter 2 år fra oppstartdato.

Ressurssenteret administrerer også eit nasjonalt energinettverk for grunnskular og vidaregåande skular, satsinga på undervisning i polar-året samt eit kompetansesenter for fornybar energi. I tillegg står ressursenteret som arrangør av Vest-Telemarkkonferansen. Ein samarbeider med Bygdelivsmeklaren (Vest-Telemark Næringsutvikling) og Rekrutteringsprosjektet (Vest-Telemark Næringsforum) med tanke på å utvide yrkesmessa til jobbmesse.

Bø Vidaregåande Skule, avd Seljord.

Skulen har for tida 94 elevar og tilbyr vidaregåande utdanning innan restaurant- og matfag og medie- og kommunikasjonsfag. Skulen har også eit tilbod innan opplæring i mindre grupper (OIMG). For komande skuleår vert i tillegg vg3 påbygging til generell studiekompetanse flytta frå Bø til Seljord.

Fyresdal vidaregåande Steinerskule.

Skulen vart starta opp i 2003 og har i dag line for naturbruk med fokus på natur, kultur og økologisk landbruk samt line for bygg og anlegg med vekt på økologisk byggeteknikk.

Desse linene har i alt 15 elevar. Ein har i tillegg eit 2-årig masterstudium med 40 studentar.

Skulen har også godkjenning for studium i almenfag, men dette er så langt ikkje starta opp

Det vert arbeidd med å omorganisere skulen som stifting og ein ynskjer ei utvikling i retning utdanningscenter.

Kvitsund Gymnas

Kvitsund Gymnas har inneverande år 190 elevar og tilbyr utdanningsprogrammet for studiespesialisering (tidl.almenfag). Det er svært mange elevar som søker seg til Kvitsund Gymnas og det har i seinare år vore ein betydeleg byggeaktivitet ved skulen

Høgskolen i Telemark, avd. Rauland.

Avdelingen har til ei kvar tid om lag 100 studentar. Ein tilbyr både årsstudium og fordjupning innanfor faga folkekunst, tre, metall, tekstil og folkemusikk. I tillegg tilbyr ein deltidssstudium i tradisjonsmat, deltidssstudium i kreativ maskinstriking samt masterstudium i tradisjonskunst.

Seljord Folkehøgskole

Skulen har for tida 73 elevar fordelt på følgjande 7 liner: Friluftsliv, Multisport, Musikk, Musical, Singasongwriter, Tekstildesign og Biletkunst. Elevane kjem frå ulike kantar av landet.

Attføringsstilboda i regionen.

Seljord Personal AS:

Stifta i 2001 og fullt ut eigd av Seljord kommune. Har APS og AB-plassar. Leverer tenester til næringslivet og offentleg sektor. Hovudomsetninga er mot NAV.

Vi TO Kompetanse AS:

Etablert i 2003. Tokke kommune eig 70% av aksjane medan Vinje kommune eig 30%. Utvikla seg frå å vera ein såpeprodusent til ein attføringsbedrift med breidt tilbod. 60% av inntektene kjem frå NAV medan 40% kjem frå produksjon. Verksemda har 10 APS plassar, 3 AB-plassar og 3 "fase 3" plassar. Har og tilbod om plassar direkte til kommunen. Har planar om nybygg på Dalen.

Telemark Lys AS:

Etablert i 1993 og hadde sitt utspring i Seljord Lys. Er 100 % eigd av Fyresdal kommune. Har ein produksjon av pulkar som syner ein positiv utvikling. Produserer og kakeformer i plast. Produksjonen utgjer om lag 50% av omsetnaden og 50% frå NAV. Har 5 "fase 3" plassar. Usikkerhet rundt AB og APS-plassane. Helseprosjektet er det viktigaste prosjektet reint økonomisk. Her er det permanent inne 10 personar. Har eit dysleksiprosjekt og har hatt ansvar for flyktningmottaket i Fyresdal.

Vinje Vekst AS:

Etablert i 1994. Verksemda er 80 % eigd av Vinje kommune og 20 % eigd av Tokke. Omset for om lag 5 mill der 3 mill kjem frå NAV og 2 mill frå eigen produksjon. Verksemda har berre VTA plassar. Har samarbeid med Vi TO kompetanse.

Kviteseid Arbeidssamvirke AS:

Etablert i 1992. Kviteeid kommune eig det alt vesentlege av aksjane, men Nissedal kommune og private har ein liten andel. 28 brukarar totalt. Har 5 VTA plassar i Nissedal og sel VTA plassar til Kviteeid og Seljord kommunar. Var i utgangspunktet ein VTA bedrift med fokus på produksjon. Har lakering i Nissedal og treproduksjon i Kviteeid. Har og ein bruktbutikk i Kviteeid. Verksemda eig sjølv bygga der dei driv.

Dei 5 attføringsbedriftene er no inne i ein prosess med tanke på vidare framtidig samarbeid.

Kartlegging av viktige lokaliseringsfaktorer for potensielle tilflyttarar.

Prosjektet "Vi snur vinden – fleire folk til Vest-Telemark" er meir eit handlingsprosjekt enn eit reint kartleggingsprosjekt og inneber aktiv marknadsføring og oppfylgjing av moglege tilflyttarar.

Vest-Telemark Næringsutvikling har frå 1. april 2007 engasjert Emilie Asplin som prosjektleiar i full stilling over ein 3-årsperiode for å få auka tilflytting til regionen.

Prosjektet er i rute i høve til prosjektplanen. Prosjektleiar har skaffa seg eit stort nettverk i regionen og det er gjennomført omfattande intern profilering. Det er så langt arrangert Vest-Telemarktreff på Smuget i Oslo 2 gonger, siste gongen i mai inneverande år. Arrangementa har hatt god oppslutning.

I desember 2008 vart det arrangert juletreff i Oslo med spesiell fokus på småbornfamiliar.

Prosjektet har til no retta seg mot om lag 500 personar/familiar og har ei portefølje på 80 personar/familiar.

Småbruksprosjektet.

Marknadsføringa av småbruk til leige og sal skjer gjennom smårukssidene på Vest-Telemarkportalen, og det er bygdelivsmeklaren som no står for denne tenesten.

Stimulere til rekruttering av arbeidskraft.

Rekrutteringsprosjektet i regi av strategisk næringsplan har gjennomført 2 av 3 prosjektår. Prosjektet blir leia av Vest-Telemark Næringsforum. Hovudmålet med prosjektet er å fremje Vest-Telemark som ein bu- og arbeidsmarknadsregion. Tiltaket er iverksett med utgangspunkt i at mange verksemder og kommunar har hatt problem med å skaffe nok kvalifisert arbeidskraft. NAV har ei nøkkelrolle i prosjektet. Det er etablert faste møtepunkt med marknadsnettverket i til NAV i Vest-Telemark, der ein 6-8 gonger årleg i prosjektpersonen går gjennom arbeidskraftbehovet til 50-60 nøkkelverksemder i regionen. I tillegg har alle registrerte verksemder fått brev om prosjektet med tilbod om bistand, og vil få dette på nytt i 2009.

I tillegg til konkret arbeid med rekruttering av arbeidskraft til kommunar og verksemder, har prosjektet koordinert to marknadsføringskampanjer for ein felles jobbmarknad i Vest-Telemark. I desse vart både offentlege og private jobbar frå heile regionen gjort synlege.

For ytterlegare synleggjering av arbeidsmarknaden i regionen er det etablert eit samarbeid med Yrkesmessa på Vest-Telemark Vidaregåande skule. Ei utvida jobb- og yrkesmesse vart arrangert 5. februar, og ein er einige om å halde fram med samarbeidet også i 2010.

I samarbeid med Bygdelivsmeklaren har prosjektet også vore arrangør av Vest-Telemark treff i Oslo, som vart arrangert 7. mai 09. Fokus her var moglegheitar for jobb i regionen. Ei rekje kommunar og verksemder syntre fram sine moglegheitar på stands. Dette, saman med eit innhaldsrikt sceneprogram, danna grunnlaget for ei offensiv marknadsføring av regionens arbeidsmarknad for potensielle heimflyttarar.

Det er også lagt til rette for utanlands jobbrekruttering gjennom NAV Eures systemet.

Konkret representerte prosjektet ca 10 verksemder og kommunar i eit rekrutteringsframstøyt på Island i slutten av februar 2009. Ein fekk fin lærdom kring utanlands rekruttering, og ei av verksemndene som deltok fekk tilsett arbeidskraft på staden. Det er lagt opp til ny runde mot Sverige med tanke på rekruttering til offentleg sektor. Tiltaket kjem på bakgrunn av ei behovsanalyse som vart gjort i samband med at prosjektet vitja administrasjon og politisk leiing i alle Vest-Telemark kommunane i januar/februar 2009.

Generelt har behovet for arbeidskraft i Vest-Telemark endra seg som resultat av finanskrisa. Det er ikkje lenger eit generelt problem med mangel på arbeidskraft, men mange verksemder og kommunar manglar framleis nøkkelkompetanse. Prosjektet vil rette innsatsen mot desse i resten av prosjektperioden, og arbeide saman med bygdelivsmeklaren for å få fram Vest-Telemark som ein bu- og arbeidsmarknadsregion.

Fylgje opp dei aktuelle tiltaka i næringsplanen.

Prosjektet "Framtidsretta utvikling i landbruket i Vest-Telemark" er no avslutta og det ligg føre sluttrapport for dette. Av rapporten går det mellom anna fram at satsing på landbruk er ein viktig del av det å utvikle regionen som felles bu-, arbeids- og opplevingsplass, og at næringsutvikling på garden vil vera ein viktig strategi for å ivareta Vest-Telemark og Telemark sin identitet.

Informasjon om Vest-Telemark som den gode plass for busetting, arbeid og opplevelinger.

Ole Dalen i Vest-Telemark Næringsutvikling er leiar for prosjektet.

Hovudmålet er å styrke omdømet for Vest-Telemark som den gode plass for busetting, arbeid og opplevelinger. Prosjektet har effektmål som inneber:

- auka kjennskap til Vest-Telemark som region
- auka attraktivitet ved å stå fram som felles bu- og arbeidsregion
- kommunelæringa står fram med optimisme og begeistring
- auka begeistring for regionen

Prosjekteiar har hatt eit nært samarbeid i høve til prosjekta "vi snur vinden", reiselivsprosjektet og rekrutteringsprosjektet (dei to siste er ein del av strategisk næringsplan). For å få ei god utnytting av ressursane har prosjektet køyrt ei forprosjektfase som vert avslutta 1. juni i år. Ein del av arbeidet har vore å skape ein felles visuell identitet som alle kommunane kan samle seg rundt. Rapport frå forprosjektet vil være klar i medio juni, og mykje tyder på at hovudprosjektet vil verta meir spissa mot merkevarebygging og samla profilering av Vest-Telemark.

Bedriftsstyre med kompetanse og aktivitet

Prosjektet starta opp hausten 2007. Det er til no arrangert to kursrundar i styrekompesanse med til saman 45 deltakarar frå både privat og offentleg sektor. Det vil bli arrangert ein runde til hausten 2009. Det er utarbeidd systematikk for ein styrekandidatbase for Vest-Telemark som både private og offentlege verksemder kan nytte i sitt rekrutteringsarbeid.

Basen vil i fyrste omgang leggast ut som ein del av heimesidene til Vest-Telemark Næringsforum, med mogleg linking til andre heimesider. Det er naturleg å sjå ein framtidig base under eitt, i ei samla web-løysing for regionen.

Vest-Telemark Næringsforum er ansvarleg for gjennomføring av prosjektet.

Mål 2 Sterk regional samkjensle og styrke Vest-Telemarkidentitet

Stø opp om kulturtiltak som fremjar kjennskap, identitet og samhandling.

Vest-Telemarkkonferansen er ein samlingsplass for politikarar, privat næringsliv, offentleg tilsette og organisasjonar og har vore eit årvisst innslag dei 6 siste åra. Tema til no har vore: "Regionalt samarbeid eller kommunesamanslåing", "Regional næringsutvikling", "Ny energi til Vest-Telemark", "Vest-Telemark som merkevare", "Kor skal byen ligge ?" og no i 2009: "Er skulen i Vest-Telemark konkurransedyktig ?".

Landskonferansen for regionråd er ein årleg møtestad for politikarar og administrasjon i kommunar, regionråd, fylkeskommunar, interkommunale selskap/samarbeidsorgan, fylkesmenn, KS og departement. Vest-Telemarkrådet skal stå som arrangør av komande konferanse og denne skal finne stad i Vrådal 24. – 25. august 2009. Tema denne gongen er mellom anna kommunestruktur, arealforvaltning og regionråda si rolle.

Sogelandet vart etablert i 2005 og er namnet på ei rekke kulturarrangement i kommunane Fyresdal, Hjartdal, Kviteseid, Nissedal, Seljord, Tinn, Tokke og Vinje.

Det er løyvd midlar til prosjektet frå Telemark fylkeskommune og frå Fellesfondet over ein periode på 3 år. Sogelandet er frå 2008 organisert som eit samvirke og det er tilsett dagleg leiar. Det er utarbeidd intensjonsavtale mellom Sogelandet SA, Telemark fylkeskommune og kommunane i Vest-Telemark, Tinn og Hjartdal. Avtala set som føresetnad at Sogelandet får status som nasjonal knutepunktdestinasjon og krev at Staten bidreg med 1,5 mill kroner årleg medan Telemark fylkeskommune og nemnde kommunar går inn med kvar sine 500 000 kroner pr år. Det vert arbeidd med å vidareutvikle Sogelandet som samarbeidsorgan ikkje berre på framføring av spel men også i andre samanhengar.

SkiTelemarklauget bidreg til å rekrutttere unge skiløyparar og til å profilere regionen gjennom telemarksporten. Sekretariatet er plassert på Norsk Skieventyr i Morgedal. SkiTelemarklauget har vore initiativtakar og medspelar i samband med World Cup i telemarkskøyring på Rjukan frå 2004 og fram til i dag. Vidare vert det arrangert årvisse skidagar i Morgedal for skulane i regionen. Ein legg frå i år opp til å arrangere ein konferanse, "Telemarknedslaget", som er tenkt å vera eit årleg nærings- utdannings- og kulturforum der politikarar, næringsinteresser, utøvarar/arrangørar av telemarksporten og samarbeidspartnerar elles set Telemarksporten og namnet Telemark i fokus.

Morgedalsprosjektet, pilgrimstaden for skihistorie nyttar merkenamnet Morgedal for å skape grunnlag for ny næringsverksemeld i regionen. Ein har snart 2,5 år bak seg innan kulturbasert næringsutvikling med basis i Morgedals historie, og søker om å forlenge prosjektet eitt år. Ein tek sikte på å kvalifisere seg som kandidat til større nasjonale midlar, og ynskjer å gjera Morgedal til "det mest attraktive reisemål i verda for den skienteresserte pilgrimsturisten". I tillegg til Rjukan og Bjarli er Morgedal no inne som ein del av Worldcup- opplegget med innlagte arrangement.

Det er også utvikla eit vinterarrangement, Morgedalsleikane, som er tenkt halde årleg. Arrangementet vil ha fokus på telemarksporten og vil såleis bli ein arena for kultur og identitet.

Legge til rette for godt regionalt samarbeid, herunder elektronisk kommunikasjon.

Vest-Telemarkrådet er regionråd for kommunane: Fyresdal, Hjartdal, Kviteseid, Nissedal, Seljord, Tokke og Vinje.

Regionrådet er eit samarbeidsorgan for dei deltagande kommunane på alle område og alle plan og skal løye felles spørsmål og oppgåver for dei deltagande kommunane. Tinget er det øvste organet og er samansett av ordførar, varaordførar, eitt anna kommunestyremedlem og rådmannen i dei deltagande kommunane. Ordførarane i kommunane utgjer Rådet og står for den daglege drifta i lag med sekretariatet. Etter vedtak i kommunestyret har Hjartdal meldt seg inn i Kongsbergregionen og går ut av Vest-Telemarkrådet med verknad frå 5. august 2009.

Fellesfondet har gjennom mange år vore felles organ for kommunane Fyresdal, Hjartdal, Kviteseid, Nissedal, Seljord, Tinn, Tokke og Vinje. Oppgåva til fondet har vore å forvalte delar av dei årlege konsesjonskraftmidlane frå utbyggingsane i dei 8 kommunane.

Fellesfondet har såleis grunnfinansiert Vest-Telemark samarbeidet pluss Tinn. Midlane har vore nytta til å delfinansiere interkommunale samarbeidsordningar, og private investeringsprosjekt med klar interesse for fleire kommunar.

I samband med fornying av konsesjonskraftavtalene vil Fellesfondet opphøre 1. januar 2011 og seinare konsesjonskraftinntekter vil bli overført Telemark Utviklingsfond og ha heile Telemark som verkeområde.

Vest-Telemark Næringsutvikling AS (VTNU) har kontor i Kviteseid, og har som føremål å styrke og vidareutvikle næringslivet i Vest-Telemark. Dette skal skje ved å yte bedriftsrådgjevingstenester, ta initiativ til og gjennomføre bedriftsretta prosjekt, regionale utviklingsprosjekt og oppgåver av næringspolitisk karakter. Samarbeidsprosjekt på tvers av kommunegrensene skal prioriterast. Som regionalt utviklingselskap vil ein ha eit særleg ansvar for å fremja regionen sine interesser. Dette gjeld på det næringspolitiske området, men og med tanke på å gje næringslivet best moglege rammevilkår å arbeide under. Selskapet har i dag 8 tilsette.

Vest-Telemark Næringsbygg AS (VTN) med kontor i Kviteseid, som har som føremål, i samråd med andre aktørar, å styrke og vidareutvikle næringslivet i Vest-Telemark, Drangedal og Hjartdal. Dette skal skje ved å ta del i ulike typer næringsbygg, selskap og verksemder. Viktig fokus er å legge til rette for næringsetablering gjennom å tilby rimelege og attraktive utleiebygg. Selskapet eig i dag 10 bygg i 5 kommunar.

Gab- og kartsamarbeidet inneber at det lovpålagte vedlikehaldet av GAB-data no skjer regelmessig via felles server. GAB-registra blir no avløyst av den såkalla matrikkelen som også er ei felles løysing. Samarbeidet er på mange måtar eit utviklingsprosjekt der nytten kjem gradvis og over tid. Kartløysinga er også integrert i sak/arkiv prosjektet og kan nyttast av publikum i samband med elektroniske byggesøknader. Kartløysinga er elles ei generell løysing i første rekke for at publikum (innbyggjarar og hyttefolk) kan ha tilgang til detaljerte, lokale kart.

Samarbeidet går nå inn i ei ny fase med vekt på god integrasjon og dataflyt mellom dei ulike systema i kommunen, noko som gjer det mulig med sikrare og meir effektivt arbeid både for eigne tilsette og andre som er brukarar av kartdata. I samarbeid mellom anna med Statens Kartverk skal alle reguleringsplanar digitaliserast og gjerast tilgjengelege.

Sak-arkiv prosjektet inneber eit sentralisert postmottak i kvar kommune og elektronisk dokumentflyt i sakshandsaminga. Sak/arkiv er i drift og ei stor og krevande opplæring er fullført. Bruk av elektroniske skjema har vore ein del av prosjektet. Prosjektet er no fullført.

Profil. Nytt IT-system for pleie/omsorg er teke delvis i bruk i alle 6 Vest-Telemarkkommunane i dag. Eit omfattande opplæringsprogram er sett i verk innan sjukeheimar og heimetenestene. I vidare arbeid har styringsgruppa no prioritert innføring av ny teknologi i heimesjukepleia, med bruk av små datamaskinar for kommunikasjon og dataregistrering (såkalla PDA-ar).

Turnusplanlegging er eit nytt samarbeidsprosjekt for 6 kommunar. Målet er betre oversikt og god ressursutnytting. I fyrste omgang blir systemet teke i bruk innafor pleie/omsorg, men systemet kan også nyttast innanfor andre område i kommunane der ein har vaktordningar. Prosjektet er i hovudsak ferdig gjennomført innafor pleie/omsorg. Vidare plan er å bruke systemet aktivt i budsjettprosessen i kommunane (sikrare grunnlagsdata) og å introdusere systemet og bruken i forhold til andre områder i kommunane enn pleie/omsorg. Dette blir då i samarbeid med rådmennene.

Drive aktiv marknadsføring av regionen

Vest-Telemarkportalen er namnet på felles nettportal for kommunane: Fyresdal, Hjartdal, Kviteseid, Nissedal, Seljord, Tokke og Vinje.

Nettadressa er www.Vest-Telemark.no. Her finn ein til ei kvar tid oppdatert kulturkalender, ledige stillingar, oversikt over ledige småbruk og nyhetsoppslag frå regionen. Det er tilknytt nyttelege linkar om næringsutvikling, innovasjon Norge, vidaregåande skular, media, kollektive transportmidde osb.

Kvar enkelt kommune har direkte tilknytning til portalen med sine heimesider der ein finn god og nyttig informasjon.

Drive alliansebygging/lobbyverksemnd og kome tidleg inn i dei ulike politiske endringsprosessane

Dette er eit omfattande "fagområde" der det til ei kvar tid foregår dialog på dei ulike politiske og administrative nivå. Ein har i regionen både formell og uformell kontakt med stortings- og fylkestingspolitikarar, med administrative leiarar og med representantar frå ulike organisasjonar og fagområde.

Kommunane og kommuneregionane er høyringsinstansar innafor mange ulike område og kjem kvart år med uttaler til ulike endringsforslag innafor den offentlege forvaltninga. Vest-Telemarkrådet har styrka sin posisjon som felles talarøy for regionen, og har også samarbeid med andre regionar.

Mål 3 Vidareutvikling og nyetablering av verksemder i Vest-Telemark med grunnlag i distriktets sær preg og lokale ressursar.

Sikre tilgang på eigenkapital

Opprettiging av eit såkornfond for regionen var oppe til drøfting i Vest-Telemarkrådet. Ei arbeidsgruppe arbeidde med saken og det vart laga eit utgreiingsdokument og ein forretningsplan som grunnlag for vidare politisk arbeid. Det vart likevel frå sentralt hald sagt nei til å yte statlege midlar til eit slikt fond og arbeidet vart såleis lagt till sides..

Stimulere til samordning av marknadsføring av reiselivet i regionen

Felles turistbrosjyre for kommunane Fyresdal, Kviteseid, Nissedal, Seljord, Tokke og Vinje er gjeve ut årleg dei seinare åra. God informasjon om Vest-Telemark bidreg til at turistane oppheld seg lenger i regionen og deltek i ulike aktivitetar på tvers av kommunegrensene.

Leggje til rette for etablering av kompetanseverksemder og nettverk

Etablerertenesten i regionen er lagt til Vest-Telemark Næringsutvikling i Kviteseid. Tenesten gjev rettleiing i samband med etablering av ny verksemd. Det vert gjeve informasjon om korleis ein etablerer ny verksemd, kva som finst av stønadssordningar, kva selskapsform som er aktuell, kva som trengst av mogleg naudsynt autorisasjon osb. I 2008 var det 86 etablererar som gjorde seg nytte av desse tenestene.

I tillegg har fleire av kommunane rådgjeving lokalt. Den regionale etablerertenesten i Vest-Telemark blir finansiert av Telemark fylkeskommune/Innovasjon Norge, Fellesfondet og NAV. Administrativ rapportering går via Innovasjon Norge.

Kulturlandskapssenteret i Telemark ligg i Hjartdal og er ein møtestad og eit nettverk for kunnskap og arbeid med kulturlandskap i kommunane. Visjonen er å fremme miljøverdiar knytt til aktivt landbruk og vise kva for moglegheiter som ligg i å nytte kulturlandskapet som grunnlag for verdiskaping og felles innsats i bygdesamfunna.

Styrke samarbeidet mellom regionalt og lokalt næringsapparat.

Eitt av tiltaka i næringsplanen går på vitalisering av næringsapparatet. Telemarkforsking har utarbeidd ein rapport om korleis næringsapparatet i regionen kan vitaliserast og korleis ein kan styrke samarbeidet mellom lokalt og regionalt næringsapparat. Rapporten vart handsama i Vest-Telemarkrådet og i dei fleste kommunane. Konklusjonen frå kommunehøyringa var at ein ikkje ynskte overføring av kommunale personalressursar til regionalt nivå, men at ein ynskte eit sterkare samarbeid innan regionen, og med koordinering gjennom VTNU. Dette koordineringsansvaret har VTNU teke på seg og vil i tida som kjem vidareutvikle samarbeidet om næringsutvikling i Vest-Telemark.

Mål 4 E 134 og Riksveg 36 held fram som det viktigaste hovudsambandet mellom aust og vest. Utvikle potensiale i Telemarksvegen (riksveg 41), som viktig korridor mot sør og kontinentet. Etablere ny infrastruktur for kommunikasjon.

Samarbeid med Haukelivegen AS, Arbeidsgruppa for E 134/Rv 36, Telemarksvegen, Vest-Telemark Næringsforum og andre viktige grupperingar.

Vest-Telemarkrådet samarbeider med ei rekke grupperingar når det gjeld infrastruktur:

AS Haukelivegen er ein interesseorganisasjon som arbeider for utbygging og standardheving av E 134 og viktige sidegreiner til denne. I styret for selskapet sit representantar frå kommunane langs vegen samt dei 3 fylkeskommunane. Selskapet spelar ei aktiv rolle i høve til planlegging og påverknad på så vel politisk som administrativt plan.

Arbeidsgruppa for E 134/Rv 36 er samansett av representantar frå regionane og Telemark fylkeskommune. Gruppa vart danna i 2000 og har som føremål å påverke planlegging og finansiering av konkrete utbyggingsprosjekt på E 134 og Rv 36 i Telemark. Arbeidsgruppa har mellom anna arbeidd aktivt for å få til utbygging av delstrekningar på E 134 og Rv 36 ved hjelp av bompengefinansiering.

Rv 41 Telemarksvegen er eit samarbeid mellom dei 6 kommunane langs Rv 4. Viktige arbeidsoppgåver for gruppa er å legge til rette for Rv 41 som opplevingsveg. Det vert arbeidd med å få til ei gjennomgåande sykkelrute frå Kristiansand til Vrådal. Delar av denne går på nedlagte jernbanetrásar mellom Åmli og Treungen.

I samband med regionreformen har Rv 41 fått riksvegstatus og vil såleis fortsatt vera staten sitt ansvar. Det er nyleg valt ei arbeidsgruppe i vår region som skal organisere tiltak på Rv 41 for å utvikle denne som korridor mot sør og kontinentet.

Vest-Telemark Næringsforum er ei næringspolitisk medlemsforeining og ein møteplass for å fremje kompetanse og nettverksbygging mellom dei private verksemndene i Vest-Telemark. Foreininga har i dag omlag 100 medlemmer innan enkeltmannsføretak, verksemder/selskap, rådgivingsmiljø, forskning, bankar og organisasjonar i Vest-Telemark. Verksemda fungerar som talerøy for næringslivet i regionen, og har mellom anna engasjert seg i å styrke samarbeidet i regionen, samferdselsspørsmål, kapitaltilgang m.m.

Arbeide mot sentrale styresmakter spesielt i høve til Nasjonal Transportplan og vurdere bruken av ressursar.

Forslag til nasjonal Transportplan 2010 – 2019 vart lagt fram for Stortinget 13. mars 2009. For Telemark innehold NTP 2010 – 2019 fleire viktige prosjekt og legg føringar for framtidig utbygging. Århus – Gvammen startar opp som statleg finansiert prosjekt i fyrste del av planperioden med fullføring i siste del. Det same gjer gjennomføringa av E 134 gjennom Kongsberg. Det er lagt føringar for nye tunnellar på Haukelifjell og forbi Røldal i andre del av planperioden, og det same gjeld utbetring langs Stordalsvatnet i Etne. I andre del av planperioden kjem også tunnel under Boknafjorden (Rogfast) under føresetnad av delvis bompengefinansiering.

Det ligg såleis an til å bli realisert fleire store prosjekt både i og utanfor Telemark, og fylket vårt har fått god utteljing etter intern semje, godt informasjonsarbeid og solid påverknadsarbeid utført av ei rekke personar/organisasjonar.

Fremje tiltak for alternativ finansiering av sentrale investeringsprosjekt.

Brukarsfinansiering av 3 delstrekningar på E134 og Rv36.

Det er løyvd midlar frå Vest-Telemark, Midt-Telemark og AS Haukelivegen til planleggingarbeid i høve til mogleg brukarsfinansiering av dei 3 delparsellane: Åmot – Seljord på E 134, Gvarv – Slåttekåstunnelen på Rv 36 og Seljord – Sjørporten på Rv 36. Planarbeidet er starta opp, og det er Statens vegvesen som står for dette. Arbeidet vil, etter at ein er gjennom dei naudsynte politiske prosessane, danne grunnlaget for endelege forslag til bompengesvedtak. Stortinget har den endelege godkjenninga i slike saker men er ikkje avhengig av Nasjonal Transportplan sidan det er tale om 100 % bompengefinansiering.

Bompengeselskap.

Telemark fylkeskommune, saman med kommunane Nome, Sauherad, Bø, Seljord, Kviteseid, Tokke, Vinje og Hjartdal har gjort formelle vedtak om å opprette eit bompengeselskap for finansiering av utbyggingsprosjekt på E134 og Rv36 i Telemark. Selskapet har namnet "E 134 og Rv 36 Telemark AS" og har forretningsadresse i Skien.

Sikre full utbygging av breiband i regionen.

Det er investert meir enn 30 millionar kroner i breibandutbygging i regionen dei siste åra i form av RDA-midlar og innsats frå dei ulike kraftlaga. I tillegg har ein fått 2,5 millionar kroner i HØYKOM-midlar frå Staten. Desse midlane er no nytta som planlagt og ein er i hovudsak ferdig med arbeidet. Sluttføring av breibandutbygginga skjer samordna i regi av Telemark fylkeskommune. Det har kome ny løying frå HØYKOM og frå KRD med føresetnad at ein får plass også den lokale finansieringa. Med unntak av Hjartdal vil denne utbygginga vera fullført i løpet av 2008. For Hjartdal vil ein også måtte nytte fyrste halvår 2009. Målet for utbygginga er 100 % dekning til fastbuande i regionen. I tillegg har ein fått med utbygging fram til mange hytteområde.

Arbeide for full dekning innan mobilsamband og digitalt bakkenett.

I samarbeid med fylkeskommunen og andre kommunar i Telemark har Vest-Telemark Næringsutvikling arbeidd med å kartlegge område med dårlig mobildekning. Det viser seg å vera liten kommersiell interesse for utbygging, og ein vil no prøve ut alternative modellar.

Arbeide for realisering av høgfartsbane over Haukelifjell.

Selskapet Norsk Bane AS har vore ein pionér innan arbeidet med høgfartsbane i Noreg og arbeider for realisering av Haukelibanen.

I ei fersk utgreiing slår Deutsche Bahn fast at høgfartsbane over Haukelifjell har større samfunnsnytte enn tidlegare påvist og at denne har best lønsemrd av dei alternativa som er utgreidd. Dette vert no spela inn i samband med handsaminga av NTP i Stortinget.

Sak 42/2009 Felles grafisk profil for Vest-Telemark.

Bakgrunn

I møte 17. mars 2009 handsama Vest-Telemarkrådet *sak 28/2009 Felles grafisk profil for Vest-Telemark*. Dette er eitt av tiltaka i strategisk næringsplan for Vest-Telemark, og er ein viktig del av omdømeprosjektet. Prosjektleiar Ole Dalen frå Vest-Telemark Næringsutvikling var tilstades og orienterte nærmare om saken.

Det vart gjort slikt vedtak:

"Forslaget til felles profil for Vest-Telemark blir å sende til kvar enkelt kommune for nærmare handsaming. Vest-Telemarkrådet legg til grunn at kommunane inviterer prosjektleiar til å orientere nærmare om forslaget. Ein vil be om rask handsaming og tilbakemelding med tanke på endeleg handsaming i rådsmøtet i mai."

På rådsmøtet 19. mai møter prosjektleiar og legg fram resultatet av handsaminga i dei ulike kommunane.

Sak 43/2009 Sluttrapport landbruksplanen.

Bakgrunn.

I møte 19. juni 2007 godkjende Vest-Telemarktinget strategisk næringsplan for Vest-Telemark 2007 – 2010.

Planen inneholder 7 strategiske tiltaksområde med ei rekke tiltak innanfor kvart område. Under tiltaksområde nr 2: *Lønsemd og lokal foredling*, finn ein tiltak 2.1.” Framtidsretta utvikling i landbruket” .

Føremålet til tiltaket er mellom anna å finne ut kva for utviklingsbehov landbruket i Vest-Telemark har, og kva dei aktuelle bruk kan gjera for å tilpasse driftsopplegg, kompetanse og ressursbruk til dette.

Karin Kvålsseth frå Vest-Telemark Næringsutvikling har vore prosjektleiar og det ligg no føre sluttrapport for prosjektet.

Av rapporten går det fram at det har vore nytta ulike virkemiddel for å nå måla.

Vi nemner:

- Bygdekompasset, bedriftsutviklingsprogram for gardbrukarar og mindre bygdebedrifter
- Studietur til Valdres og Gudbrandsdalen
- Rettleiing v/VTNU for gardbrukarar /verksemder med tilknytning til landbruket
- Nettverksmøte for landbruksansvarlege
- Økonomidag for landbruket
- Motivasjonsforedrag
- Foredrag i samband med årsmøta i dei lokale landbruksorganisasjonane

Rapporten peikar også på at det er trond for vidare arbeid med profesjonalisering og næringsutvikling på garden. Det er aktuelt å modernisere driftsbygninga.

Vidare kan det vera aktuelt å få til eit prosjekt med koordinering av rådgjeving innan teknisk planlegging og driftsøkonomi for å gje grunnlag for avgjerd om mogleg vidare satsing.

Det er vidare spela inn forslag om auka satsing på sauehald etter modell frå Sogn og Fjordane. Vest-Telemark Næringsutvikling har også sett på moglegheitene for å få til eit pilotprosjekt i Vest-Telemark rundt problematikken rundt generasjonsskifte på garden.

Frå avslutningen av rapporten refererer vi fylgjande:

”Satsing på landbruk bør vere ein viktig del av det å utvikle regionen som felles bus-, arbeids- og opplevingsplass. Næringsutvikling på garden, enten det er attåtnæring eller volumproduksjon, vil vere ein viktig strategi for å ivareta Vest-Telemark og Telemark sin identitet”.

Sluttrapport



Utvikling av landbruket i Vest-Telemark

Prosjektansvarleg:
Vest-Telemark Næringsutvikling

Prosjektleiar:
Karin Kvålsseth

Samarbeidspartnarar:
Telemark Bondelag
Bygdefolkets studieforbund

Innhold

1. Samandrag	2
2. Målrealisering.....	2
3. Oppsummering av prosjektarbeidet /erfaring med metoden	3
4. Kostnader og rammer	5
5. Avslutning	5

Sluttrapport

1. Samandrag

Prosjektet "Framtidsretta utvikling i Landbruket" hadde som mål å sjå på kva utviklingsbehov Landbruket i Vest-Telemark har, og få flest mogleg til å gjere ein strategisk posisjonering for å tilpasse driftsopplegg, kompetanse og ressursbruk.

Virkemedel for å nå målet:

- Bygdekompasset- eit bedriftsutviklingsprogram for gardbrukarar og mindre bygdebedrifter vart gjennomført i tre runder. I etterkant har alle fått tilbod om rettleiing ved VTNU eller anna kompetansestøtte med inntil 15 timer.
- Studietur til Oppland 22-24 august 2008 (sjå vedlegg)
- Rettleiing ved VTNU for gardbrukarar eller anna landbruksrelatera verksemد.
- Nettverksmøter for landbruksansvarlege i Vest-Telemark me ulike fagtema frå mellom anna Jordskiftedomstolen i Øvre Telemark.
- Økonomidag for Landbruket.
- Åpent motivasjonforedrag på Årsmøtet med Telemark Sau og Gjeit
- Foredrag på årsmøte til lokale landbruksorganisasjonar

Av dei me har hatt aktiv konktakt med i prosjektet har rettleiinga ført til 51 planar for utvikling på garden. Til no er det løyst ut ca 1,25 mill i offentleg tilskot til ulike utviklingstiltak på garden innan kulturlandskapspleie, tilleggsnærings eller volumproduksjon.

2. Målrealisering

Målet var å involvere minst 100 gardbrukarar i drøfting og vurdering av eige bruk. Prosjektet har som mål at minst 25 brukarfamiliar i løpet av 2 år kjem i gang med ein planmessig omstilling av drifta, og at kompetansetilpassing og nettverksskaping er ein del av dette.

I løpet av prosjektperioden har me hatt kontakt med 127 gardbrukarar.

I løpet av prosjektperioden har 24 gardsbruk vore med på Bygdekompasset. Evalueringa av kurset har vist at deltakarane hadde glede og utbytte av det kurset gav. 15 av dei har ynskja rettleiing ved VTNU eller har fått anna fagleg hjelp i form av rådgjevarar eller Byggteknisk planleggjar. Dei har laga Framdriftsplanar/ handlingsplanar med basis i rettleiing på Bygdekompasset.

I tillegg har VTNU rettleia 27 gardbrukarar eller anna landbruksrelatera verksemد i prosjektperioden som ikkje har vore med på Bygdekompasset.

3. Oppsummering av prosjektarbeidet /erfaring med metoden

Bygdekompasset - eit låg terskel tilbod

Totalt sett er me nøgde med deltakinga i prosjektet. Dette er takka vere godt samarbeid med dei lokale landbrukskontora og BSF. Bygdekompasset viste seg å vere eit passande kurs for å nå ei målgruppe med ulike prosjektidear, motivasjon, type og nivå av satsing. Utfordringa med brei invitasjon til deltaking er at me fekk deltaking alt frå dei som driv hobby til dei som driv aktiv næringsverksemd.

For å få med deltakarar med høg motivasjon kan det vere ein fordel med ein høgare "inngangsbillett" eller ei klarare målgruppe. Det kan og vere ein fordel å velje ei målgruppe som ligg innan for Handlingsprogrammet for BU-midlar. Her vil potensialet til å løyse ut tilskot til prosjekta vere større. Deltakarane syner at det er behov for at det fins eit kurs/tilbod i samband med etablering av ny verksemd. For somme har kurset vert ein viktig del av det å ta personlege val.

Rettleiing

Motivasjon for rettleiing ligg i hovudsak i det å løyse ut finansiering frå det offentlege, men også i det å gjere gode val. Me har erfart at gode idear rundt utvikling ikkje nødvendigvis passar inn med prioriteringar innan landbruk. Dette er eit dilemma med tanke på det potensialet prosjektet har til å auke inntening kontra evna til å realisere meirverdien i gardens ressursar på ein bærekraftig måte ut frå eigenkapital/lån.

Gå frå ord til handling.

I ei spørjeundersøking på kva som hadde skjedd etter bygdekompasset kontakta me 10 tilfeldig utvalte. Tilbakemeldingane på Bygdekompasset var framleis at dette hadde vore ein positiv oppleveling. Eit fleirtal hadde ikkje nytta rettleiing i etterkant. Årsaka var ramnefaktorar som tid, økonomi og personlege forhold. Det var delte meiningar når det gjaldt motivasjon for deltaking. Dei som var med på grunn av potensialet til å løyse ut økonomiske verkemidel var ikkje så positive, som for dei som var med for å kunne ta meir konkrete val for kva dei skulle gjere vidare. For dei som har tatt nye val/ lagt nye planar har dette vært ei god oppleveling.

VTNU har valt å bruke meir tid i prosjekt der det har vore større investeringar inne i bilete, eller prosjekt med potensiale. Dette har vist seg positivt. Godt samarbeid med næringsapparat og moglegheit for å løyse ut tilskot i kommunen har vist seg fordelaktig, også i kontakt mot Innovasjon Noreg. Prosjekt som har hatt rettleiing og hjelp frå VTNU har utløyst om lag 1,25 mill i offentleg tilskot til Vest-Telemark Landbruket frå 2007-2009. Dette har stort sett vore mindre prosjekt som rydding av kulturlandskap, etablerarstipend, bedriftsutvikling, forprosjekt for større satsing på Volumproduksjon.

Rettleiing utanom Bygdekompasset.

Fleire har blitt kjent med VTNU som rådgjevingsapparat for etablering og bedriftsutvikling. Innan dei økonomiske rammene prosjektet har me hatt rom for å prioritere prosjekt med potensiale, og hjelpe dei fram i jungelen av søknadspapir og med å vurdere økonomi.

Vidare arbeid:

Det er framleis behov for profesjonalisering og arbeid med næringsutvikling på garden. Her vil det vere viktig med tett dialog med Innovasjon Norge og FMLA for å satse mot rette målgrupper.

Erfaringar syner at fylgjande satsing vil vere viktig i Vest-Telemark framover.

Volumproduksjon/ Tradisjonelt Landbruk

For å ha eit aktivt husdymiljø er det framleis viktig å satse på Landbruk i Vest-Telemark. Det viktig at aktørane sjølv får kome på banen å sei noko om behova dei har. Framover vil modernisering av driftsbygningar vere aktuelt å fokusere på. Det kan vere eit godt tiltak å få til eit prosjekt med koordinering av rådgjeving innan Teknisk planlegging og driftsøkonomi for å kunne gjere ein dokumentera avklaringar for vidare satsing. Dette bør skje i nært samarbeid med Innovasjon Norge.

Bonde og Småbrukar laget har spela inn ein satsing på sau slik dei har satsa i Sogn og Fjordane gjennom prosjektet "Framtidsretta sauehald i Sogn og Fjordane".

Det er også viktig å tenkje på generasjonsskifte. VTNU AS har dialog med Noregs Bygdeungdomslag og prosjekta "Nå er det min tur" og "Slipp oss til" og ser på moglegheitene til å få i gang eit pilotprosjekt i Vest-Telemark. Det er sett av 37.000 frå prosjektmidlane til å jobbe vidare med forstudie for konkretisering og samarbeid rundt denne satsinga.

Attåtsnæring –Etablerer/Bedriftsutvikling

I etterkant av bygdekompasset har det kome fram områder å jobbe vidare med, som prosjekt eller konkret økonomisk samarbeid om drift av tenester.

- Kompetanseheving innan marknadsretta sal og distribusjon.
- Vidareutvikling gjennom for eksempel FRAM AGRO.
- Eit regionalt tilbod om Etablerarkurs.
- Utvikle eksisterande fagmiljø der gardbrukarane sjølv tar initiativ.

4. Kostnader og rammer

Sjå vedlagt hovudrekneskap frå prosjektet.

Underrekneskap-prosjekt

	BUDSJETT NOK	UNDERREKNESKAP NOK
Kostnadsart (Hovudpostar)		
PROSJEKTARBEID OG LEIING		
Lønn prosjektarbeid	420000	506610
Sosiale utgifter	147000	177314
Husleige	30000	30000
IKT	30000	30000
Diverse: lønnsauke ol.	53000	35766
PROSJEKTARBEID OG LEIING	680000	779690
KONSULENT		
(Bygdekompasset x 3)	250000	166002
MØTER OG KONTORDRIFT		
Møteutgifter/ Kurs	60000	33000
Porto, rekvisita, kopiering	30000	3808
Arbeid/tiltak i referansegruppa	60000	15000
MØTER OG KONTORDRIFT	150000	51808
REISER OG MARKNADSFØRING		
Reiseutgifter: Prosjektleiar og medarbeidar	20000	4717
Reiseutgifter: Referansegruppa	20000	0
Reiseutgifter: Studietur	40000	84484
REISER OG MARKNADSFØRING	80000	89201
Forsstudie BU-Pilot i Vest-Telemark "Slipp oss til" og "Nå er det min tur"	0	37000
SUM TOTAL	1160000	1123701
SUM UTNYTTA MIDLAR		699

	BUDSJETT NOK	UNDERREKNESKAP NOK
Finansiering:		
Fellesfondet	400000	760000
Fylkesmannen	350000	350000
Eigendel frå deltagarane	60000	14400
SUM TOTAL	1160000	1124400

5. Avslutning

Prosjektet har synt behov for kurstilbod og rettleiing for å gjere avklaring rundt vidare satsing i landbruket. Derfor vil rekruttering vere eit viktig satsingsområde.

Landbruk har stor ringverknad. Dei er med på å forme landskapet og ivareta lokal matproduksjon. Dette er ein viktig ressurs for næringsutvikling i bygdene. Framover vil det med fokus på regionalparkar, landskap og naturarv vere viktige strategiar for vidare satsing på bygdeutvikling og næringsutvikling. Det er også viktig å sjå til korleis ein kan skape ei betre sjølvkjensle som gardbrukar, og nytte dette som kvalitet i vidare satsing

på utvikling av Vest-Tekmark. Satsing på landbruk bør vere ein viktig del av det å utvikle regionen som felles plass for bu, arbeids og oppleveling. Næringsutvikling på garden anten det er attåtnæring eller volumproduksjon vil vere en viktig strategi for ivareta Vest-Tekmark og Telemark sin identitet,

Stad: Kviteeid Dato: 290409

Stad: Kviteeid Dato: 290409

Signatur Prosjektleiar
Karin Kvålseth

Signatur dagleg leiar VTNU
Haldor Kaasin

VEST TELEMARK NÆRINGSUTVIKLING AS

PROSJEKT 495 OMSTILLING I LANDBRUKET

DRIFTSREKNESKAP I PERIODEN 2006 - 2009

		REKNESKAP 2006	REKNESKAP 2007	REKNESKAP 2008	REKNESKAP 2009	TOTAL
	DRIFTSINNTEKTER					
3161	REFUSJON AV KOSTNADER	(400 000,00)		(12 500,00)	(1 900,00)	(14 400,00)
3406	TILSKOT FELLESFONDDET			(360 000,00)		(400 000,00)
3406	TILSKOT FELLESFONDDET			(175 000,00)		(360 000,00)
3415	FYLKESVISE BU MIDLAR			(175 000,00)		(350 000,00)
	SUM INNTEKTER	(400 000,00)	(175 000,00)	(547 500,00)	(1 900,00)	(1 124 400,00)
	DRIFTSKOSTNADER					
6540	UTSTYR OG PROGRAMVARE		15 745,20			15 745,20
6720	KONSULENTHONORAR		52 800,00	9 784,40	51 352,00	113 936,40
6730	PROSJEKTLEETING	6 000,00	174 150,00	482 640,00	116 900,00	779 690,00
6840	FAGLITTERATUR		300,00		349,00	649,00
6860	MØTER, KURS		8 478,25	120 418,15	30 170,70	159 067,10
6890	KONTORUTGIFTER		2 265,00	2 200,00		4 465,00
7100	BILGODTGJERSLE	105,00		3 946,00	486,00	4 537,00
7150	DIETGODTGJERSLE			180,00		180,00
7320	ANNONSER/REKLAME FORSTUDIE "slipp oss til"		3 480,00	4 951,20		8 431,20
	SUM DRIFTSKOSTNADER	6 105,00	257 218,45	624 119,75	199 257,70	1 123 700,90
	SUM UNYTTA LØYVDE MIDLAR/OVERSKOT PROSJEKT					(699,10)

KVITESEID 27. APRIL 2009

Vest-Tellemark Økonomi
og Rekkesab A/S (ARS)
3850 Kviteseid

JØRGEN MOEN

Sak 44/2009 Vest-Telemark Bedriftshelseteneste, tilbod om bedriftshelseteneste.

Bakgrunn.

I brev av 15. april 2009 orienterer dagleg leiar Gunnar Ofte i Vest-Telemark Bedriftshelseteneste innleiingsvis om verksemda, arbeidsomfanget og forskriftene ein arbeider etter.

Verksemda har for tida 3,7 årsverk fordelt på 5 tilsette og kontoret er på Dalen.

Det er i dag 77 medlemsbedrifter av ulik storleik med tilsaman 1390 tilsette som er knytt til bedriftshelsetenesten. Av kommunane er det berre Tokke og Fyresdal som er tilslutta ordningen.

Gunnar Ofte opplyser i brevet at ein no førebur seg på nye krav og at det er ynskjeleg med eit større medlemsgrunnlag for å kunne bygge opp eit større kompetansemiljø og styrke attraktiviteten som arbeidsplass i regionen.

Kommunane vert utfordra på fylgjande 3 punkt:

- Er det av interesse for kommunane å ha ein sterk lokal leverandør av bedriftshelsetenester ?
- Treng Vest-Telemark eit lokalt forankra kompetansemiljø innafor arbeidsmiljø ?
- Om ein er positiv til nemnde punkt, er det i så fall vilje i kommunane til å slutte seg til Vest-Telemark Bedriftshelseteneste ?

Dagleg leiar Gunnar Ofte vil vera tilstades i rådmøtet 19. mai og orientere nærmare om saken.



Regionrådet for Vest-Telemark

3850 KVITESEID

Dalen 15.04.09

Bedriftshelstenestetilbod i Vest-Telemark ?

Bakgrunn

Vest-Telemark bedriftshelseteneste(VTBH) er ei felles bedriftshelseteneste for verksemnder i Vest-Telemark. Årsmøtet er øvste organ og vel styret for VTBH. For tida er det fem tilsette fordelt på 3,7 årsverk. VTBH har kontor på Dalen, men for det meste av tida er konsulentane ute i arbeid hjå medlemsverksemndene. 77 små og store bedrifter med til saman 1390 tilsette er for tida tilslutta ordninga. Av desse er det to kommunar, Tokke og Fyresdal. Dei andre kommunane har valt andre ordningar. VTBH arbeider etter forskrift om verne- og helsepersonale. Verne- og helsepersonalet er personar som er sakkunnige når det gjeld:

- Tilhøve som må overvakas i høve arbeidstakerane sin tryggleik og helse
- Kontroll av arbeidstakerane si helse
- Førebyggande arbeid som gjeld helse, miljø og tryggleik.

Arbeidsgjevar skal sørge for at verne- og helsepersonalet:

- a) Bistår med planlegging og gjennomføring ved etablering, vedlikehald og endring av arbeidsplassar, lokaler, utstyr og produksjonsmetodar og utarbeiding av retningslinjer for bruk av kjemikalier, maskiner og utstyr
- b) Bistår med løpende kartlegging av arbeidsmiljøet, føretek arbeidsplassundersøkingar og vurdere risiko for helsefare.
- c) Fremjer forslag om førebyggande tiltak og arbeider aktivt for tiltak som fjerner sjukdomsfremkallande faktorar og farar for ulukker.
- d) Overvakar og kontrollerar arbeidstakerane si helse i høve arbeidssituasjonen og føretek nødvendig oppfølging.
- e) Bistår med å tilrettelegge arbeidet for den enkelte arbeidstakar.
- f) Bistår med å gje informasjon og opplæring på områda arbeidshelse, yrkeshygiene, ergonomi og generelt verne- og miljøarbeid.
- g) Gjev informasjon om helse-, miljø- og tryggleiksrisiko til arbeidsgjevar og tilsette.
- h) Bistår i bedriftsinternt attføringsarbeid.

Regjeringa med satsing på BHT

Syner til Ot.prp. nr 54. Arbeids- og inkluderingsdepartementet fastsette 11.02.09 ny bransjeforskrift. Det er denne som styrer kva for verksemnder som må tilslutte seg bedriftshelseteneste. Den er nå utvida med 8 nye bransjar, m.a. helse- og sosialsektoren og undervisningssektoren. Til grunn for utvidinga ligg Arbeidstilsynet sine faglege tilrådingar



Vest-Telemark Bedriftshelseteneste

og kunnskapar om kva for bransjar som har størst belastning og der utstøting frå arbeidslivet er størst. I 2008 sendte regjeringa på høyring også eit forslag om også å innføre ei

obligatorisk godkjenningsordning for bedriftshelsetenesta basert på kompetanse, volum på tenesta og kvalitetssikring. Godkjenningsordninga og ny bransjeforskrift er nå vedteke og er gjeldande frå 01.01.10. Departementet meiner at det, for å oppnå ønska forbetring av dei tenester som i dag vert tilbjode innafor BHT-området, er naudsynt å stille krav som bidreg til at det vert skapt større kompetansemiljø med breidare fagleg samansetning. Eit arbeidsmiljø består av mange ulike problemstillingar, og desse har som oftast ein sterk indre samanheng. Å bidra til arbeidsmiljøforbetringar krev difor omfattande tverrfagleg kompetanse som gjev grunnlag for ei heilhetleg rådgjeving.

VTBH førebuer seg på godkjenning

VTBH må nå som andre bedriftshelsetenester førebu seg på dei nye krav. Me opererer i dag med samarbeidsavtalar og innleige av kompetanse som me sjølv ikkje innehavar. Om dette vil fylle krava til ”eit breit nok kompetansemiljø” er ein noko usikker på ennå. Det hadde vore ønskjeleg å hatt eit større medlemsgrunnlag, for å bygge opp eit kompetansemiljø. Dette hadde styrka VTBH som ein attraktiv arbeidsplass, men også som eit kompetansesentrum for arbeidsmiljø for private og offentlege verksemnder i Vest-Telemark.

Me opplever at private verksemnder lojalt sluttar seg til VTBH som ei fellesateneste for vår region. Historiane om kva som ligg til grunn for at 4 kommunar i Vest-Telemark ikkje kjøper tenester av ein lokal teneste er nok mangfaldige.

I samband med at norsk arbeidsliv vil styrke BHT-ordninga ønskjer me å utfordre kommunane i Vest-Telemark til å tenke over følgjande?

- Er det av interesse for kommunane å ha ein sterk lokal leverandør av bedriftshelseteneste og
- treng Vest-Telemark eit lokalt forankra kompetansemiljø innafor arbeidsmiljø ?
- Om ein ønskjer dette, er det vilje til å slutte seg til VTBH ?

Ber med dette om å få kome i Regionrådet for Vest-Telemark og utdjupe våre synspunkt ytterlegare, få tilbakemelding på vår førespurnad og gjerne ta del i ein diskusjon. Vonar dette let seg gjere på møtet den 19. mai.

Med venleg helsing

Gunnar Ofte
Dagleg leiar

Sak 47/2009 Prøvebustader i Vest-Telemark

Bakgrunn.

Prøvebustad er eit nytt konsept der folk får tilbod om å leige bustaden for ein nærmare bestemt periode med tanke på å finne ut om dei trivest i regionen. Ei slik prøvebustad er under bygging i Øyfjell, og i e-post av 4. mai 2009 frå bygdelivsmeklar Emilie Asplin går det fram at ho undersøkjer mogelegheten for å utvide prøvebustad-konseptet til å gjelde fleire stader i Telemark. Tilbakemeldingane tyder på at det er interesse for konseptet i mange kommunar.

Emilie Asplin vil saman med arkitekt Sverre Sondresen vera tilstades på rådsmøtet 19. mai og informere om moglegheiten for eit utvida prosjekt, og ein legg der opp til ei nærmare drøfting om saken.

Kjell Gunnar Heggernes

Fra: Emilie Asplin

Sendt: 4. mai 2009 10:34

Til: Kjell Gunnar Heggernes

Kopi: sverresondresen@gmail.com; Lene Hennum

Emne: Informasjon om prøvebustad

Hei Kjell Gunnar!

Her kjem informasjon om prøvebustad-prosjektet som me skal orientere om den 19.mai:

Bakgrunn:

Med bakgrunn i prøvebustaden som skal byggjast i Øyfjell, ynskjer me no å undersøke moglegheita for å utvide konseptet *prøvebustad* til fleire stader i Vest-Telemark. Me har hatt eit møte med Telemark Fylkeskommune v/Geir Berge Nordtveit og Lene Hennum, der også representantar frå Husbanken, VTN, Øyfjell City og arkitektkontoret som teikna den fyrste bustaden var til stades. Arkitekt Sverre Sondresen har hatt møte med Innovasjon Noreg, som gjennom sitt program ”virkeområde tre” er svært interesserte i eit slikt prosjekt. Telemarkforsking v/Knut Vareide og Solveig Svardal er også blitt kontakta og informerte i håp om at ein kunne få til eit samarbeid også inn mot forskingsmiljøa. Resultata frå desse møta var at det var semje om at prosjektet var verdt å satse på. VTNU v/bygdelivsmeklaren tok på seg koordineringsansvar for å lodde stemninga blant kommunar som kunne vere interesserte. Me har fått positiv tilbakemelding frå så å seie alle kommunane, og tek difor denne saka til vidare drøfting i Vest-Telemark Rådet.

Om konseptet prøvebustad:

Ein prøvebustad er ein bustad for folk som ynskjer å sjå om dei trivst i Vest-Telemark før dei eventuelt slår rot og kjøper eller leiger sin eigen bustad. Prøvebustaden vil ha ein avgrensa leigeperiode i samsvar med Husleigelova. Det er mangel på leigebustader fleire stader i regionen, særleg i mindre grender, og såleis dekkar prøvebustaden eit praktisk behov.

Samstundes er tanken at prøvebustaden skal ha ein breiare effekt. Han bør gli inn i den fleirkjernestrukturen som Vest-Telemark har vald som modell, og kvalitetar og identitet på staden vil vere viktig når prøvebustaden skal utformast. Ynsket er at han skal bli ei merkevare som vil gje staden ei god marknadsføring mot potensielle tilflyttarar. Gjennom lokal forankring vil han kunne vere med å knyte lokalbefolkinga på staden tettare til beboarane i prøvebustaden, som såleis vil ha lettare for å slå rot.

Arkitekt Sverre Sondresen, samt VTNU v/Emilie Asplin kjem til å vere til stades den 19.mai for å informere om kva for tankar me har knytt til det eventuelle vidare arbeidet med prøvebustader. Me ynskjer å ha ei innleiing på om lag 10 min, for så å setje av det meste av tida til spørsmål og drøfting om evt vidare arbeid med prosjektet. Me håpar å kunne få 30 min, og helst litt meir viss det er mogleg?

Beste helsing
Emilie

Emilie Asplin
Bygdelivsmeklar/prosjektleiar
Vest-Telemark Næringsutvikling
Tlf: 35 06 84 00 / 92 89 99 98
ea@vest-telemark.no
www.vest-telemark.no

Sak 48/2009 Møte med fylkesmannen

Bakgrunn

Vest-Telemarkrådet har invitert fylkesmann Kari Nordheim Larsen og medarbeidrarar til rådsmøtet 19. mai. Møtet inngår som eit ledd i samarbeidet og kommunikasjonen mellom staten v/fylkesmannen og kommunane, og det vert lagt opp til dialog omkring følgjande saker:

- Utviklingsarbeidet, herunder litt om skjønnsmidlane
- Samarbeidet mellom dei ulike forvaltningsnivåa
- Forvaltningsreformen, spesielt i høve til landbruk og miljø
- Ny lov om biomangfald og kva denne vil bety for kommunalt planarbeid
- Mogleg etablering av nettverksgruppe for personell som arbeider med plan- og bygningsloven

Til denne saken er også dei administrative leiararne frå dei andre regionråda i fylket invitert.